

Areglo Literatura Karibe

Den kaso di diferensia entre e vershonnan na papiamentu i hulandes di e areglo di supsidio, e teksto original na hulandes ta obligatorio.

E direktiva di Nederlands Letterenfonds, teniende kuenta ku e determinashon den e Algemene wet bestuursrecht, teniende kuenta ku artíkulo 10, insiso 4 di e Wet op het specifiek cultuurbeleid, teniende kuenta ku e Algemeen reglement Nederlands Letterenfonds. ta disidí:

Artíkulo 1. Definishonnan

Den e areglo akí ta komprondé bou di:

<i>direktiva:</i>	e direktiva di Nederlands Letterenfonds;
<i>Letterenfonds:</i>	Stichting Nederlands Letterenfonds;
<i>Parti Karibense di Reino:</i>	e paisnan Aruba, Kòrsou, Sint Maarten i e tres entidatnan públiko Boneiru, Saba i Sint Eustatius;
<i>kreador literario:</i>	un persona natural establese den e parti karibense di Reino ku ta tin un profeshon òf ku tin e ambishon di tin un profeshon den kreashon òf tradukshon di literatura;
<i>literatura:</i>	kreashonnan literario na hulandes, ingles, friso, papiamentu òf idioma di seña hulandes, òf tradukshon di esaki;
<i>kreashon literario:</i>	un obra literario original;
<i>organisashon:</i>	un entidat hurídiko sin intenshon lukrativo establese den e parti karibense di Reino ku un registro na un di e Kámaranan di Komèrsio den e parti karibense di Reino, ku ta un organisashon kultural supsidia òf no supsidia òf un otro entidat hurídiko ku ta aktivo den e sektornan kultural;
<i>proyekto:</i>	tur trabounan pa un aktividat literario òf trayekto pa desaroyo di talento independiente, ku ta definí di forma konkreto, delimitá den tempu i propósito;
<i>Ingles:</i>	e idioma ingles manera papiadónan nativo ta papia esaki den e parti karibense di Reino;
<i>Papiamentu:</i>	Papiamento i papiamentu.

Artíkulo 2. Meta

Ku e areglo akí, Letterenfonds ke oumentá e oferta literario den e parti karibense di Reino, en partikular e oferta di obranan na papiamentu. Ademas, Letterenfonds ke fortalesé e infrastruktura literario na e sitio ei i sostené trayektonan pa desaroyo di talento.

Artíkulo 3. Aktivitatnan pa kual por hasi petishon pa subsidio

Por hasi petishon pa subsidio solamente pa un proyekto den e siguiente kategorianan:

- a. kreashon di obranan literario;
- b. desaroyo di talento;
- c. aktivitatnan literario.

Artíkulo 4. Eksigensianan pa e petishonario

1. Solamente e siguiente nan por hasi petishon pa subsidio:
 - a. kreadornan literario;
 - b. organisashonnan.

Artíkulo 5. Basenan pa rehaso

Den tur kaso ta rehasá e subsidio si:

- a. e petishonario òf e petishon no ta kumpli ku e reglanan den e areglo akí;
- b. un proyekto anterior pa kual a otorgá un subsidio na e mesun petishonario a base di e areglo akí, no a keda finalisá ainda;
- c. e petishonario a risibí subsidio kaba òf lo risibí subsidio a base di un otro areglo di Letterenfonds pa e aktivitatnan pa kual ta hasi petishon pa subsidio a base di e areglo akí;
- d. e aktivitatnan ta di naturalesa sientífiko so òf ta trata di produkshon di material di enseñansa.

Artíkulo 6. Periodo di petishon, sistema di repartishon i montante máksimo di subsidio

1. E periodo pa hasi petishon ta kuminsá for di e dia despues di publikashon di e areglo den e Staatscourant te ku 1 di novèmber 2024 òf mas trempan si a alkansá e montante máksimo di subsidio. Letterenfonds ta anunsiá riba su wèpsait ora ku a surpasá e montante máksimo di subsidio.
2. Ta trata petishonnan na sekuensia ku a risibí nan.
3. Tumando na konsiderashon artíkulo 11, insiso sinku di e Algemeen Reglement, ta konta komo fecha di risibimentu e fecha riba kual Letterenfonds a risibí e petishon kompletu.
4. E montante máksimo di subsidio pa aña 2024 ta € 300.000. Lo anunsiá eventual kambionan den e montante akí den e Staatscourant i riba e wèpsait di Letterenfonds.

5. E montantenan máksimo di supsidio pa añanan 2025 i despues, meskos ku e fechanan di inisio i e último fechanan di e periodonan di aplikashon den e añanan ei, ta wòrdu publiká tur aña den yanüari riba e wèpsait di Letterenfonds i den e Staatscourant.

Artíkulo 7. Eksigensianan pa e petishon

1. Ta hasi un petishon pa supsidio pa medio di un formulario di petishon trahá dor di Letterenfonds pa e areglo akí.
2. Ta prosená un petishon solamente si e formulario di petishon ta yená kompletamente, firmá i kompaña pa e siguiente aneksonan:
 - a. un plan di proyekto digital (video òf oudio) òf un plan di proyekto por eskrito konforme e eksigensianan den e formulario di petishon;
 - b. un presupuesto spesifiká di e proyekto, por eskrito, ku splikashon.
3. Ta entregá e aplikashonnan den un di e siguiente idiomanan: hulandes, papiamentu, ingles, friso òf e idioma di seña hulandes.
4. Petishonnan ku a wòrdu rechasá a base di e kriterionan di evaluashon manera mensioná den artíkulo 9, no por wòrdu entregá mas pa e mesun proyekto.

Artíkulo 8. Suma di e supsidio i durashon di e proyekto

1. Pa kada petishon e supsidio ta suma un máksimo di € 25.000 pa un kreador di literatura i un máksimo di € 50.000 pa un organisashon.
2. Mester finalisá e proyekto den un término máksimo di 1 aña despues ku a otorgá e supsidio.

Artíkulo 9. Kriterionan di evaluashon

1. Ta evaluá tur petishon segun e siguiente kriterionan:
 - a. plan di proyekto;
 - b. balor agregá di e proyekto pa e islanan;
 - c. deskripsjon di e petishonario;
 - d. kalidat di redakshon/selekshon di obra/guia/kolaborashon;
 - e. grupo di enfoke i manera ku lo aserká públiko (si ta relevante);
 - f. presupuesto (a base di e malchi di Letterenfonds).
2. Pa por otorgá e petishon e opinion tokante tur e kriterionan apliká mester ta positivo.

Artíkulo 10. Konsehonan

1. Petishonnan ku ta bini na remarke pa un evaluashon di e kontenido ta keda entregá pa konseho na por lo ménos un konsehero eksterno.

2. E konsehero eksterno ta evaluá e petishonnan a base di e kriterionan di evaluashon menshoná den artíkulo 9, i ta konsehá si ta otorgá e supsidio òf nò i e montante di supsidio.

Artíkulo 11. Desishon

E direktiva ta informá e petishonario por eskrito di su desishon denter di 22 siman despues di risibí e petishon kompletu.

Artíkulo 12. Obligashonnan di esun ku risibí supsidio

1. E direktiva ta imponé riba esun ku risibí supsidio e obligashon ku:
 - a. ta hasi aktividatnan pa kual a otorgá e supsidio i ku e supsidio no ta wòrdu gastá na otro aktividatnan;
 - b. ta informá Letterenfonds di manera korekto i ku bèrdat na tur momentu;
 - c. ta menshoná nòmber i logo di Letterenfonds riba tur deklarashon públiko relashoná ku e aktividatnan supsidiá;
 - d. ta invitá Letterenfonds na tempu pa partisipá na eventual aktividatnan públiko pa kual a otorgá supsidio;
 - e. esun ku risibí supsidio no ta violá derechonan di outor di terseronan;
 - f. esun ku risibí supsidio ta koperá ku investigashon inisiá pa òf na nòmber di Letterenfonds ku tin komo meta pa duna Letterenfonds informashon na bienestar di desaroyo di e maneho.
2. Esun ku risibí supsidio ta notifiká e direktiva mas pronto posibel por eskrito di sirkunstansianan ku por ta importante pa un desishon pa modifikashon, revokashon òf stipulashon di e supsidio. Ademas, lo entregá e dokumentunan relevante. Den tur kaso ta hasi e notifikashon akí, si ta probabel ku:
 - a. e aktividatnan pa kua e supsidio a wòrdu otorgá no a wòrdu ehekutá òf lo no wòrdu ehekutá, no a wòrdu ehekutá na tempu òf kompletamente ni lo no wòrdu ehekutá na tempu òf kompletamente, òf
 - b. no ta kumpli òf no lo kumpli, no ta kumpli na tempu òf kompletamente, ni lo no kumpli na tempu òf kompletamente ku e obligashonnan di supsidio òf
 - c. a bini kambionan supstansial pa loke ta trata e datonan entregá na Letterenfonds ora ku a hasi e petishon den kuadro di otorgamentu di supsidio òf stipulashon di supsidio òf a bini kambionan relashoná ku e implementashon di e plan di proyekto kompará ku e petishon òf sirkunstansianan speshal a presentá nan mes.
3. Esun ku risibí supsidio ta duna pèrmit na Letterenfonds pa publiká òf multipliká (partinan di) e rapòrt di e proyekto òf otro dokumentashon di proyekto (inklusio imágennan) den kuadro di relato di e trabounan di Letterenfonds sin ku esun ku risibí supsidio òf un eventual tersero ku derecho ta haña kompensashon pa esei.

4. Letterenfonds por imponé riba esun ku risibí supsidio e obligashon ku:
 - a. e atministrashon di e petishonario ta duna un bista korekto i kompletu di e aktividatnan supsidia i ta kuadra ku e presupuesto presentá ku e petishon;
 - b. e komprobantenan ku ta pertenesé na e atministrashon, ku ta mustra klaramente e tipo i alkanse di e aktividatnan eligibel, ta keda wardá pa por lo ménos shete aña despues ku a stipulá e supsidio;
 - c. esun ku risibí supsidio ta koperá ku òf ta sigurá ku e akountent ta koperá ku investigashonnan, riba trabounan (di kòntrol) hasí dor di dje, dor di un partido ku lo wòrdu apuntá dor di e direktiva di Letterenfonds. Ta asumí ku e gastunan asociá na esaki ta inkluí den e supsidio.

Artíkulo 13. Otorgamentu, stipulashon i pago di supsidio te ku € 25.000

1. Otorgamentu di supsidio te ku € 25.000 lo keda stipulá inmediatamente despues di e otorgamentu.
2. E suma stipulá lo wòrdu pagá na e petishonario denter di ocho siman.

Artíkulo 14. Otorgamentu, vorskòt i stipulashon di supsidio ku ta surpasá € 25.000

1. Otorgamentu di supsidio ku ta surpasá € 25.000 lo wòrdu pagá denter di ocho siman na e petishonario den forma di un vorskòt.
2. Esnan ku risibí un supsidio ku ta surpasá € 25.000 ta obligá pa entregá un relato, si ta nesario ku un deklarashon di gastunan i entradanan real, denter di tres luna despues di terminá e proyekto.
3. Pa otorgamentu di supsidio ku ta surpasá € 25.000 ta konta ku si e aktividatnan a ser ehekutá di akuerdo ku e petishon i a kumpli ku tur obligashon asociá ku e supsidio, esun ku ta risibí supsidio ta entregá un petishon denter di 13 siman pa un dekreto pa stipulashon di e supsidio. E direktiva ta duna e dekreto pa stipulashon di e supsidio denter di 22 siman despues di e petishon.

Artíkulo 15 Basenan pa revokashon i modifikashon di otorgamentu òf stipulashon di supsidio

1. E direktiva por revoká òf modifiká e stipulashon di supsidio si esun ku risibí supsidio no a kumpli ku e obligashonnan mará na e supsidio.
2. Si e direktiva konstatá ku a bini kambionan supstansial pa loke ta trata e datonan entregá ku e petishon, e direktiva por revoká òf modifiká e otorgamentu di supsidio òf e stipulashon di supsidio.
3. Si e petishonario ta un persona natural, e direktiva ta outorisá pa kambia òf revoká e otorgamentu di supsidio òf e stipulashon di supsidio pa motibu di morto di e petishonario. No ta redusí e otorgamentu di supsidio òf e stipulashon ku porshonnan di supsidio òf vorskòt ku ya a wòrdu pagá, a ménos ku ta stipulá di otro pa e areglo parsial.

4. E revokashon òf kambio lo tin efekto retroaktivo te na i inkluyendo e momentu ku a otorgá òf stipulá e supsidio, a ménos ku ta determiná otro den e revokashon òf kambio.
5. E montante ku kual posiblemente lo por redusí e supsidio, ta wòrdu deskontá for di partinan di e supsidio ku posiblemente ya a paga òf e montante ta wòrdu rekuperá. Si esun ku risibí supsidio no a kumpli ku e obligashon di mèldu manera stipulá den artíkulo 12, insiso dos, e direktiva por fiha e supsidio na sero i rekuperá e montante di supsidio inkluso e interes legal debí.

Artíkulo 16. Klóusula di duresa

Debí na e interes ku e areglo akí tin komo meta pa protehá, e direktiva por keda sin apliká un artíkulo òf desviá for di esaki tanten ku un aplikashon estrikto lo kousa un inhustisia di índole konsiderabel.

Artíkulo 17. Determinashon final

Den tur kasonan ku no ta stipulá den e areglo akí, e direktiva lo tuma un desishon.

Artíkulo 18. Entrada na vigor

E areglo akí ta drenta na vigor entrante e dia despues di publikashon di e Staatscourant den kual e wòrdu publiká i ta vense riba 31 desèmber 2028. Kontrali na e promé frase e areglo akí ta keda aplikabel manera e tabata riba e dia promé ku e fecha riba kual e areglo akí ta vense, pa ora ta kompletá e petishonnan entregá i supsidionan otorgá a base di e areglo akí.

Artíkulo 19. Título pa sitashon

Ta sita e areglo akí komo: **Areglo Literatura Karibe**

Lo publiká e areglo akí ku e splikashon den e Staatscourant.

Nederlands Letterenfonds,

R.N. de Bildt,

Direktor- dirigente

SPLIKASHON

E Areglo Literatura Karibe ta un areglo di impulso spesífikamente pa kreadornan literario i organisashonnan den e parti karibense di Reino. E meta di e areglo ta pa hasi e kuantanan original, poesia i presentashonnan literario di i riba e paisnan i islanan ampliamente lesá i tendé. En partikular e fondo ke oumentá e oferta di literatura na Papiamentu (Papiamentu i Papiamentu). Ademas, e fondo ta enfoká riba inisiativanan ku ta fortifiká e infrastruktura literario den e parti karibense di Reino. Den otro palabra: ku ta kontribuí na un klima (di lesamentu) literario kaminda tin oportunitatnan struktural pa eskritornan i traduktornan profeshonalisá nan mes mas, pa publiká nan obra literario – den forma di buki, riba tarima òf den forma digital – i pa trese nan trabou na nan públiko (ku ta lesa). E sekshon di buki den e parti karibense di Reino no ta komparabel ku esun na Hulanda Oropeo. Por ehèmpel, aktualmente kasi no tin kas di publikashon ku riba nan mes gastu ta guia i publiká eskritornan, i e kantidat di tiendanan di buki tambe ta limitá. Hopi biaha eskritornan ta haña nan mes obligá pa tuma e proseso di produkshon den nan mes man, te na e distribushon i promoshon di nan propio obra. Ku e areglo akí Letterenfonds ke hasi posibel pa kreadornan i organisashonnan produsí nan propio obra i alkansá un públiko.

Ken ta bini na remarke?

Bo ta bini na remarke si:

- bo ta aktivo komo outor, poeta (di presentashon), ilustrador, artista di arte di palabra, artista di slam, traduktor literario òf outor dramátiko;
- komo organisashon bo ta organisá aktivitatnan literario, manera un festival òf eventonan di promoshon di lesamentu;
- komo organisashon bo ta publiká obra literario, den forma di buki, òf den un proyekto, manera un obra di teatro òf podcast;
- komo organisashon bo ta yuda desaroyá talento dor di duna guia den skirbimentu, tradukshon, redakshon (final) òf presentashonnan riba tarima.

Pa kiko por hasi petishon?

E supsidio ta destiná pa diferente inisiativanan riba tereno di literatura den tur género: novela literario, kuenta, kolekshon di poesia, arte di palabra, tekstonan di arte dramátiko, no-fikshon literario, literatura pa mucha i literatura hubenil. Riba papel, tarima òf den forma digital.

E fundashon ta distinguí tres kategoria:

1. Kreashon di obranan literario nobo

Por trata aki di un beka pa trabou/ honorario pa skirbi un teksto literario nobo òf pa gastunan di tradukshon di un teksto literario eksistente pa òf for di papiamentu, tambe pa edishonnan multilingual. Tambe por hasi petishon pa e gastunan di produkshon di publikashonnan di buki, inkluso redakshon/guia, produkshon, alkanse públiko/presentashon, distribushon, òf e gastunan di produkshon di proyektonan literario

interdisiplinario òf multimedio. Por ehèmpel, por hasi petishon pa gastunan di redakshon/guia, produkshon, alkanse públiko/presentashon i distribushon.

2. Desaroyo di talento

Aki ta trata e desaroyo profeshonal di e kreadornan literario. Por ehèmpel, pa establese òf partisipá na tayernan òf kursonan riba tereno di skirbimentu kreativo i tayernan di tradukshon literario. Esaki ta inkluí tambe guia, mentorado, coaching, skol i trayektonan ku ta train e trainer. Ademas, por pidi supsidio pa un plan di investigashon den kual abo komo kreador literario ta investigá e posibilidatnan i e faktibilidat di bo ambishon literario. Por ehèmpel: elaborá un idea pa un buki tantu riba un nivel di kontenido i artistiko, komo riba un nivel komersial: ken ta bai publik'é, ken ta hasi e redakshon, kiko ta e gastunan di publikashon. Por último, e gastunan di residensia òf gastunan di biahe por ta un parti modesto di un petishon pa supsidio.

3. Aktivitatnan literario

E supsidio ta pa organisashonnan ku ta ehekutá aktivitatnan públiko riba tereno di literatura. Por ehèmpel, tene festivalnan, kompetensianan di skirbi, programanan literario online i offline, literatura den bario i eventonan 'open-mic'. Esaki por inkluí aktivitatnan di promoshon di lesamentu ku ta tuma lugá tantu paden komo pafó di sala di skol, pa grandi i chikitu, manera den biblioteka.

Un petishon por bai tokante diferente kategoria na mesun momentu. E petishonario no mester (pero por) limitá su mes na un kategoria.

Kon ta evaluá un petishon?

Ta evaluá petishonnan segun e siguiente kriterionan:

a. E plan di proyekto

Puntonan ku ta wòrdu diskutí den e evaluashon ta: e ophetivonan, e aktivitatnan, e skema di tempu i e resultadonan sperá di e proyekto. Si un trayekto pa desaroyo di talento ta parti di e petishon, ta trata di e struktura i e ophetivo di esaki. Tambe ta importante ken ta guia e kandidato durante e trayekto, inkluso un splikashon dikun a skohe eksaktamente e persona/personanan akí. Por ehèmpel, e tin hopi eksperensia? Ora ta trata di un petishon pa un plan di investigashon, e evaluadó òf konsehero ta wak e metanan, e struktura, presupuesto i e balor agregá di e plan pa e kreador literario.

b. Balor agregá di e proyekto pa e islanan

Ta evaluá kon i te kon leu e proyekto ta kontribuí na e infrastruktura literario den e área karibense. Por hasi esaki, por ehèmpel, dor di promové i stimulá literatura lokal i dor di oumentá konosementu di esaki. Ademas, proyektonan por kontribuí dor di ekspandé e oferta literario pa gruponan di enfoke spesífiko manera muchanan, hóbennan, adultonan i mayornan di edat, òf dor di stimulá literatura den e idiomaan papiá na e islanan. Ademas, ofresé plataformanan pa eskritornan, poetanan, artista i otro talentonan literario pa presentá, desaroyá, produsí i distribuí nan obra por ta relevante pa fortalesé e infrastruktura literario.

c. deskripsjon di e petishonario

Aki ta evaluá e eksperensia i ekspertisio relevante di e petishonario. Ta wak kiko e petishonario a hasi i logra kaba. Esaki ta inkluí eksperensianan relevante, edukashon, publikashonnan anterior, presentashonnan i proyektonan literario. Tambe ta wak ku ken e petishonario a traha.

- Petishonarionan individual: eskritornan, traduktornan i otro kreadornan por djis añadí nan CV òf portafolio di nan obra kreá.

- Organisashonnan: por splika nan eksperensia anterior ku organisamentu di proyektonan òf aktivitatnan literario. Por hasi esaki dor di deskribí e ehèmpelnan i resultadonan spesífiko di proyektonan anterior.

d. Kalidat di redakshon/selekshon di obra/guia/kolaborashon

Aki ta evaluá e kalifikashon i eksperensia di e redakshon, guiadónan òf partnernan di kolaborashon. Ta duna atenshon na e kalidat di e ekspertisio di e tim òf e individuonan ku ken e petishonario ke implementá su plan.

- Guiadónan individual: pa redaktornan, maestronan òf guiadónan, por hasi esaki dor di añadí un CV òf portafolio. Aki ta evaluá e eksperensia i trayectoria di e personanan enbolbí.

- Edukashon i tayernan: ora ta partisipá na un edukashon, kurso òf tayer, mester splika ken ta duna esaki i kiko e eksperensia di e organisashon akí ta den esaki.

- Partnernan di kolaborashon: Tambe serka partnernan di kolaborashon ta wak nan profeshonalismo i eksperensia. Ta evaluá kiko e partnernan akí a hasi òf a produsí te ku awor i te kon leu esaki ta kuadra ku e proyekto di e petishonario.

e. Grupo di enfoke i manera ku lo aserká públiko (si ta relevante)

Ora ku e ophetivo di e petishon ta pa alkansá un públiko, manera den publikashonnan di buki òf aktivitatnan públiko, mester definí klaramente e manera ku lo aserká e públiko i e strategia. Ta evaluá pa kua grupo(nan) di enfoke e proyekto ta destiná, inkluso e gruponan di edat i e motibu pa kiko a skohe e grupo di enfoke spesífiko akí.

Ta analisá e grado den kual e proyekto ta korespondé ku e nesidatnan i interesnan di e grupo di enfoke intenshoná i kon e petishonario tin intenshon di alkansá i enbolbí e grupo di enfoke akí. Tambe ta evaluá ku kua partnernan ta kolaborá pa e alkanse di públiko i kon e kolaborashonnan akí ta kontribuí na e éksito di e proyekto.

f. Presupuesto (a base di e malchi di Nederlands Letterenfonds)

Petishonarionan mester entregá un presupuesto balansá a base di un malchi stipulá. Ta evaluá si e presupuesto ta kompletu i tambe e sentido di realidat. Esaki ta nifiká ku tur gastu mester ta klaramente menshoná i kalkulá na un manera realístiko. E presupuesto semper ta den euro. No ta aseptá presupuestonan den otro monedanan, manera dòler òf florin antiano. Pasobra e fondo por duna supsidio solamente na euro.

Ta wak si e presupuesto ta balansá, loke ta nifiká ku mester tin suficiente sèn pa ehekutá e plan. Tambe ta tene kuenta ku kofinansiamentu : e ta disponibel i, si ta asina, a primintí esaki kaba?

Ora ta trata di organisashonnan ta evaluá si nan ta ofresé un rekompensa na kreadornan i esnan konserní di akuerdo ku e práktika i tarifanan usual riba e islanan. Pa kreadornan

individual ta kontrolá spesífikamente si e petishonario ta ofresé su mes, i eventual guiadónan, un honorario.

Si ta hasi un petishon pa un publikashon di buki, lo evaluá e akuerdonan entre e kreador i e publikadó/produktor, den kua por lo ménos e stipulashonnan tokante e porsentahe di royalties òf e honorario i e lisensia a keda akordá.

Ki ora no por hasi petishon?

No por hasi petishon dos biaha pa e mesun proyekto. Tampoko no por entregá un petishon si e proyekto anterior ku a keda sostené bou di e areglo akí no ta finalisá ainda. No por entregá un petishon si e kandidato no ta establese na òf no ta residente na Aruba, Kòrsou, Sint Maarten, Boneiru, Sint Eustatius òf Saba. Kolaborashon ku partnernan (komersial), manera kasnan di publikashon òf partnernan paden i pafó di e parti karibense di Reino, si ta posibel. Solamente, nan no por ta petishonario.

Kon e hasimentu di petishon ta bai?

Tur aña tin un periodo den kua por entregá petishon. Lo anunsiá e fecha di inisio i e fecha final di e periodo ei riba e wèpsait di Nederlands Letterenfonds. Tur aña lo publiká e montante máksimo di supsidio riba e wèpsait.

Por entregá e petishonnan riba un base kontinuo te ora ku e presupuesto di e areglo kaba. Tambe por hasi petishon den e idioma nativo di e petishonario. Esaki ta nifiká ku, ademas di hulandes, friso i idioma di seña hulandes, petishonarianan por hasi petishon den i pa proyektonan den papiamentu (papiamento/papiamentu) i ingles. Ingles ta permití solamente pa kreadornan ku ta biba den e parti karibense di Reino ku nan idioma nativo ta ingles. Den e areglo akí ta hasi petishon digital (online). Pa tur petishon, ku eksepsjon di publikashon di buki, ta posibel pa entregá e plan di proyekto via grabashon di video/oudio. E durashon máksimo di e grabashon ta indiká den e formulario di petishon online. Tambe presupuestonan, ku semper a traha den euro, semper mester wòrdu entregá riba papel.

E petishon ta wòrdu entregá a base di e formulario di petishon online ku algun pregunta spesífiko. Despues ta evaluá si e petishon ta kompletu i si e proyekto ta pas den e areglo. Si esaki ta e kaso, e petishon ta bai pa por lo ménos un konsehero eksterno di Letterenfonds, ku lo evaluá e kontenido di e petishon. Ta trata di tuma un desishon denter di 22 siman despues ku a entregá e petishon, basta e petishon ta kompletu. Promé ku entregá e petishon online, e petishonarianan por tuma kontakto ku empleadonan di Letterenfonds pa hasi nan pregunta tokante nan proyekto, e prosedura i e transkurso di e petishon pa supsidio.

Ki ora por bolbe hasi petishon?

Por entregá un petishon (ku kontenido) nobo solamente despues ku e proyekto aprobá anteriormente a keda finalisá.

Si un petishon no ta kumpli ku e eksigensianan ofisial, e petishonario lo haña e oportunitat pa koregí esaki. Si despues di esei e petishon ainda no ta kumpli, no ta prosesá e petishon.

Evaluashon

Komo ku ta trata di un areglo nobo, Letterenfonds lo evaluá e areglo despues di un término di no mas ku dos aña i lo hasi adaptashonnan si mester.